



## Penukaran Hari Bertemu Rakyat ke hari Khamis bagi memudahkan urusan rakyat

January 3, 2020 4:27 pm 0

AYER KEROH 3 Jan. – Ketua Menteri, Adly Zahari menjelaskan perubahan Hari Bertemu Rakyat yang dianjurkan daripada hari Jumaat kepada Khamis adalah bertujuan untuk memudahkan urusan rakyat.

Menurutnya, memandangkan hari Jumaat mempunyai tempoh masa yang agak terhad, maka pihaknya mengambil keputusan untuk mengubah kepada hari Khamis bagi membolehkan urusan bertemu rakyat tidak menjadi tergesa-gesa.

“Hari Bertemu Rakyat ini diubah kepada hari Khamis dari jam 8.00 pagi hingga 1.00 petang bermula 9 Januari depan. Kita buat perubahan ini bagi tujuan memudahkan urusan rakyat kerana seperti yang kita tahu hari Jumaat kita berdepan faktor masa yang agak terhad.

“Disebabkan tempoh terhad, urusan (bertemu rakyat) jadi lebih tergesa-gesa. Sebab itu kita anjakkan kepada hari Khamis dan diharap mereka yang memerlukan perbincangan dapat hadir pada Hari Bertemu Rakyat ini,” katanya.

Mengulas mengenai kepentingan Hari Bertemu Rakyat, Adly berkata melalui program seperti inilah pihak kerajaan negeri dapat mendengar keluh-kesah rakyat dan berusaha menyelesaikan setiap permasalahan yang berlaku.

Katanya, selepas program ini diperkenalkan, pihaknya telah dapat menyelesaikan hampir 80 peratus masalah rakyat di negeri ini.

“Oleh yang demikian, kita menggalakkan setiap agensi kerajaan di semua peringkat untuk sentiasa mendengar pandangan-pandangan masyarakat.

“Ini sangat penting kerana ada sebahagian daripada pandangan dan luahan masyarakat ini perlu diberikan penjelasan sewajarnya, contoh apabila berlaku penolakan daripada permohonan mereka, maka perkara itu memerlukan satu penjelasan yang sewajarnya,” katanya lagi.